

## ভাইয়েরা, কেঁদে নাও কান্নার দিন আসার পূর্বে

2020-02-14 23:01:05 +0600 +0600

3 MIN READ

"ভাইয়েরা, কেঁদে নাও কান্নার দিন আসার পূর্বে।" - ইয়াজিদ আর রাকাসী (রহিমাহুল্লাহ)

\* \* \*

কঠিন গরমের দিন আসহাব ইবনে সিওয়ার ইয়াজিদ রহ.-এর কাছে গেলে ইয়াজিদ রহ. বলেন - চলো এই প্রচন্ড গরমে আমরা পরকালের স্মরণে কাঁদি।

তারপর নিজের কোলে মাথা গুঁজে তিরস্কার করতে থাকেন- ইবাদাতগুজাররা আমাকে ছাড়িয়ে গেছে, আফসোস তাঁরা আমার আগে চলে গেছে। অথচ তিনি ৪২ বছর রোজা রেখেছেন।

তিনি ঘরে প্রবেশ করে কাঁদতেন, জানাজায় গেলে কাঁদতেন। তাঁর সহচররা তাঁর কাছে বসলে নিজে কাঁদতেন তাদেরও কাঁদাতেন। একবার তাঁর ছেলে বলল- বাবা, কত কাঁদেন! আল্লাহর কসম! জাহান্নাম যদি শুধু আপনার জন্যই তৈরি করা হতো তাহলেও এর চেয়ে বেশি কাঁদতে পারতেন না।

অশ্রুভেজা নয়নে ইয়াজিদ আর রাকাসী রহ. বলেন- কি বলছ বাছা? জাহান্নাম তো শুধু আমার জন্য, আমার সাথী-সঙ্গীদের জন্য এবং জীন-ইনসান ভাইদের জন্য তৈরি করা হয়েছে।

তারপর পড়তে লাগলেন-

يُطْفَوْنَ بَيْنَهَا وَبَيْنَ حَمِيمٍ آتٍ

"তারা জাহান্নামের অগ্নি ও ফুটন্ত পানির মাঝখানে প্রদক্ষিণ করবে।" (সূরা আর রহমান : ৪৪)

এবং ঘরের মাঝখানে প্রদক্ষিণ করতে লাগলেন তারপর চিৎকার দিয়ে বেহুঁশ হয়ে পড়েন।

তিনি কথা বলতেন আর অশ্রু দাঁড়ি বেয়ে পড়ত। তিনি বলতেন- ভাইয়েরা, কেঁদে নাও কান্নার দিন আসার পূর্বে। রোনাজারি করে নাও রোনাজারির দিন আসার আগে। তওবা করে নাও তওবার সময় শেষ হয়ে যাওয়ার পূর্বে। তাই কাঁদো, হে নবীন ও প্রবীণের দল! তারপর কাঁদতে কাঁদতে বেহুঁশ হয়ে পড়তেন। বেহুঁশ অবস্থায় তাঁকে উঠিয়ে ঘরে নিয়ে যাওয়া হতো।

এক ব্যক্তি বলল- এত কাঁদেন আপনার কি বিরক্ত লাগে না?

তিনি কাঁদতে কাঁদতে বলেন- দুগ্ধপোষ্য শিশু কি মায়ের দুধপানে বিরক্ত হয়?

আল্লাহর কসম! অশ্রুর পর যদি রক্ত প্রবাহিত করতে পারতাম তাহলে তা-ও আমি করতাম। কারণ, আমরা জানি জাহান্নামীরা রক্তাশ্রু ঝরাবে যখন স্বাভাবিক অশ্রু ফুরিয়ে যাবে।

মৃত্যু যখন ঘনিয়ে এল এবং মৃত্যুদূত উপস্থিত হল তখন তিনি কেঁদে ফেললেন।

জিজ্ঞেস করা হল- কাঁদছেন কেন?

তিনি বললেন- কাঁদি এ জন্য যে আজ থেকে দিনের রোজা, রাতের নামাজ বন্ধ হয়ে যাবে।

তারপর আহাজারি করতে থাকেন আর বলতে থাকেন- হে ইয়াজিদ, আজ থেকে কে তোমার জন্য রোজা রাখবে? কে নামাজ

পড়বে? কে-ইবা তোমার জন্য আমল করে আল্লাহর নৈকট্য ও সান্নিধ্যের ব্যবস্থা করবে? কে-ইবা তোমার বিগত গুনাহের জন্য তওবা করবে?

হায় যার বাসস্থান কবর! আল্লাহর সামনে যার কাঠগড়া! জাহান্নাম যার অবতরণস্থল! কি সংরক্ষণ করেছে নিজের জন্য। কি প্রস্তুত করেছে নিজের বধ্যভূমির জন্য। প্রভুর কাঠগড়ায় দাঁড়ানোর প্রস্তুতি গ্রহণ করেছে কি?

\* \* \*

বই: দুনিয়াবিমুখ শত মনিষী